

# Аллоҳнинг фазлидан талаб қилинг



11:56 / 12.01.2019 4081

Аллоҳ таоло Жума сурасида шундай марҳамат қилади:

اللَّهُ وَأَذْكُرُوا اللَّهَ فَضْلِ مِنْ وَابْنُغُوا الْأَرْضِ فِي فَانْتَشِرُوا الْأَصْلَوَةُ قُضِيَتْ فَإِذَا

﴿فُلِحُونَ لَعَلَّكُمْ كَثِيرًا﴾

«Бас, намоз тугаганидан сўнг ер юзи бўйлаб тарқалинг ва Аллоҳнинг фазлидан талаб қилинг ҳамда Аллоҳни кўп зикр қилинг. Шоядки, зафар топсангиз» (10-оят).

Маълумки, аввалги оятда Аллоҳ таоло азондан кейин савдони тарк этиб, намозга шошилишга буюрган эди. Энди эса жума намози тамом бўлгандан

сўнг, яна аввалги ҳолатга қайтиш мумкинлигини баён қилмоқда.

### **«Бас, намоз тугаганидан сўнг ер юзи бўйлаб тарқалинг...»**

Намоздан кейин кимдир савдосига, кимдир касал кўргани, кимдир илм талабига ва ҳоказо – ҳамма ўз ишига қайтиши мумкин. Ер юзи бўйлаб тарқалиш ҳақидаги буйруқ мажбурий эмас. Лекин баъзи кишилар бу амрга жиддий амал қилганлар. Мисол учун, Арок ибн Молик розияллоҳу анҳу жума намозидан сўнг масжид эшигидан чиқар эканлар, «Аллоҳим, даъватингга муҳаббат қилдим, фарз намозингни ўқидим ва айтганингдек, ер юзига тарқалдим. Менга ўз фазлингдан ризқ бергин, Сен энг яхши ризқ берувчисан», – дер эканлар.

### **«...ва Аллоҳнинг фазлидан талаб қилинг...»**

Аллоҳнинг фазлидан талаб қилиш давомида дунёга ҳаддан ташқари берилиб кетиб, йўлдан адашиш ҳам мумкин. Шунинг учун оятнинг охирида

### **«...ҳамда Аллоҳни кўп зикр қилинг, шоядки, зафар топсангиз», – дейилмоқда.**

Суранинг охирида Пайғамбар соллаллоҳу алайҳи васаллам жума намози хутбасини ўқиб турганларида бир гурӯҳ мусулмонларнинг савдо карвони келганидан хабардор бўлиб, чиқиб кетганлари эслатилади. Одатда карвон келаётганда дўмбира чалиб, шовқин-сурон билан келар экан. Ўшандада Набий алайҳиссалом билан ўн икки киши қолиб, бошқалар чиқиб кетган экан. Чиқиб кетганларнинг баъзилари яшаш учун зарурий ашёлари тугаб, карвонни орзиқиб кутиб турган эканлар. Баъзилари эса хутба вақтида чиқса бўлаверади, намоз вақтида чиқмасак бўлди, деб ўйлашган экан.